

Iluarsiissut

Siunnersuut 13. august 2015-imeersoq taarserpaa.

Tunngavia: Inatsisartut Allattoqarfiani inatsisitigut teknikkikkut ingerlatsivimmit aamma atuaqqissaarilluni iluarsiissutit iluarsiissutissatut aaqqiissutissamut siunnersuut ilannguppaa

Naqqiutit pingaarnertit allaaserineqarnerat: (Inatsisissatut siunnersuummi § 3, imm. 2, § 4, §§ 12, imm. 1-3 aamma § 13, imm. 1 allannagortinneqarput. § 1, imm. 3 aamma § 3, imm. 4 ilassutigineqarput. Siunnersuuttip oqaasertaanik annikitsumik aamma iluarsiisoqarpoq. Aalajangersakkat taaneqartut oqaaseqaatini nassuiaaserneqarput. Oqaaseqaatini aamma iluarsiisoqarsimavoq.)

Uunga siunnersuut: Uumasut nappaataannik inunnut tunillaassorsinnaasunik taakkulu akuinik siaruaassinnaasunik akiuiniarneq pillugu Inatsisartut inatsisaat nr. xx, xx 2015-imeersoq.

Kapitali 1

Inatsisip atortuuffia

§ 1. Inatsimmit pineqarput:

- 1) Uumasut nappaataat inunnut tunillaassorsinnaasut, taakkulu akuutissartaat siaruaassinnaasut.
- 2) Uumasogatigiit avataaninngaanniit takkuttut uumasut nappaataannik taakkulu akuinik siaruarerisinnaasut pillugit malittarisassaliorneq.
- 3) Akiuiniarnissamut pilersaarutit.
- 4) Akiuiniariaatsit.
- 5) Nakkutilliineq.

Imm. 2. Uumasut nappaataat inunnut tunillaassorsinnaasut tamarmik inatsimmi pineqarput, suliffeqarfanni inuussutissaleriffiusuni, pingaarnertut tunisassiortuni, angerlarsimaffimmi uumasuutini, nunalerinermi uumasuutini piniagassaniluunniit paasineqarneri apeqqutaatinnagit.

Imm. 3. Uumasut eqqiluitsumik pineqarnissaannut tunngasut inatsimmi pineqanngillat.

Kapitali 2

Nassuiaatit

§ 2. Inatsimmi matumani makku imatut paasineqassapput:

- 1) Uumasut nappaataat inunnut tunillaassorsinnaasut: Tassaapput nappaatit tunillannartullu uumasut inuillu akornanni toqqaannartumik toqqaannangitsumilluunniit tunillaassinnaasut.

Uumasunik toqqaannartumik attaveqarnermi nerisassalluunniit aqqutigalugit tunillaassuuttoqarsinnaavoq.

2) Uumasut nappaataasa akui siaruaassinnaasut: Bakteriat, virusit, miluuffigisaminnit ilanngartuisut (parasit) uumasut inuillu akornanni tunillaassorsinnaasut suulluunniit.

3) Uumasut eqqiluitsumik pineqarnissaannut tunngasut: Uumasuutit nappaataannik, kiisalu nunalerinermi uumasuutini piniagassanilu nappaatinik pinaveersaartitsineq, nakkutiginninneq akiuiniarnerlu.

4) Uumasoqatigiit nunatsinniittuunngitsut avataaninngaanniit takkuttut: Uumasoqatigiit pissusissamisoortumik nunatsinneersuunngitsut, takkunermikkut siaruaanermikkulluunniit uumasut assigiinngisitaarnerannik, inuit peqqissusiannik inuiaqatigiilluunniit aningaasarsiorterannik ulorianartorsiortitsisinnaasut.

Kapitali 3

Oqartussat

§ 3. Uumasunut Nakorsaqaqarnermut Inuussutissalerinermullu Oqartussaasut piginnaatitaasutut oqartussaasutut inatsimmit aqutsisuupput, kiisalu inatsimmi pineqartunik misissuillutillu nakkutilliisuupput.

Imm. 2. Naalakkersuisut piginnaatitaallutik oqartussaasunik allanik Uumasunut Nakorsaqaqarnermut Inuussutissalerinermullu Oqartussaangitsunik toqqaasinnaapput.

Stk. 3. Uumasunut Nakorsaqaqarnermut Inuussutissalerinermullu Oqartussaqaqarfiup akisussaaffigaat:

1) uumasut nappaataannik inunnut tunillaassorsinnaasunik taakkulu akuinik siaruaassinnaasunik akiuiniarnermut pilersaarusiornissaq,

2) paasissutissanik nuna tamakkerlugu akiuiniarnissamut pilersaarutitut atatillugu inernernik naliliinissamut pisariaqartinneqartunik katersinissaq,

3) suliffeqarfinni inuussutissaleriffiusuni nunatsinni niuerfimmi tuniniaanissamut akuerisaasuni akuttunngitsumik nakkutilliisarneq, inuussutissanik uumasullu nappaataannik inunnut tunillaassorsinnaasunik nakkutilliineq pillugu inatsisip malinneqarnerata nakkutigineqarnissaa siunertaralugu, aamma

4) uumasut nappaataannik inunnut tunillaassorsinnaasunik taakkulu akuinik siaruaassinnaasunik akiuiniarneq siunertaralugu naasorissaanermi uumasuuteqarnermillu akuttunngitsumik nakkutilliisarneq.

Imm. 4. Suliffeqarfiit inuussutissalerisut pingaarnerusumillu tunisassiortut Uumasunut Nakorsaqaqarnermut Inuussutissalerinermullu Oqartussaqaqarfiup qinnuiginninneratigut suliaminnik naammassinnittarnerannut pingaarutilinnik paasissutissanik tamanik § 3, imm. 3, 2-mi aalajangersarneqartunik tunniussisassapput).

Kapitali 4

Uumasoqatigiit nunatsinniittuunngitsut, avataaninngaanniit takkuttut

§ 4. Uumasut nappaataat inunnut tunillaassorsinnaasut taakkulu akuisa siaruaassinnaasut siaruarnissaat pinngitsoortinniarlugu uumasogatigiit nunatsinniittuunngitsut avataaningaanneersut qaqugukkut qanorlu atugassaqartitsilluni nunatsinnut eqqussorneqarsinnaanerannut Naalakkersuisut erseqqinnerusunik malittarisassiorsinnaapput.

Kapitel 5

Akiuiniarnissamut pilersaarutit

§ 5. Uumasut nappaataannik inunnut tunillaassorsinnaasunik nakkutilliinissaq, kiisalu tunillaassuuttoqalinnginnissaa siunertaralugu akiuussusersuinissap nakkutilliinissallu qularnaarneqarnissaa piginnaatitaalluni Uumasunut Nakorsaqaarnermut Inuussutissalerinermullu Oqartussaasut aqputigalugit Naalakkersuisut qularnaagassaraat.

§ 6. Akiuiniarnissamut pilersaarutit, taakkununga ilanngullugit uumasut nappaataannik inunnut tunillaassorsinnaasunik nakkutiginninneq, nakkutilliineq, akiuussusersuineq tunillaassortoqalinnginnissaalu siunertaralugu qanoq iliuusissat pillugit Naalakkersuisut ersarinnerusunik malittarisassiorsinnaapput.

§ 7. § 6 naapertorlugu akiuiniarnissamut pilersaarutit:

- 1) uumasut nappaataat inunnut tunillaassorsinnaasut taakkulu akuutissartaat siaruaassinnaasut takutinneqarsinnaassapput, laboratoriami misissuinissamut, il.il., pilersaarusiornikkut
- 2) piginnaatitaalluni oqartussaasup suliffeqarfinnilu nerisassaleriffiusuni aqutsisut, naasorissaasut uumasuutilillu akornanni akisussaaffimmik agguataarineq aalajangersarneqassaaq, aamma
- 3) uumasut nappaataannik inunnut tunillaassorsinnaasunik taakkulu akuutissartaannik siaruaassinnaasunik paasisaqartoqartillugu akiuiniarnissat sorliit aalajangiunneqarnermut allassimassaaq.

Kapitali 6

Akiuiniariaatsit

§ 8. Uumasunut Nakorsaqaarnermut Inuussutissalerinermullu Oqartussaasup suliniuteqarneratigit nunami pineqartumi uumasunik nerisassanillu allanik, nioqquteqarnermi, kiisalu uumasuuteqarnermi pingaarnertut tunisassiornermi uumasut nappaataasa inunnut tunillaassorsinnaasut taakkulu akuutissartaasa siaruaassinnaasut ikilisarneqarnissaannut akiuiniariaatsit immikkut ittut atorineqarsinnaanissaat atorineqartussaanerilu aalajangiiffigisinnaavai

Imm. 2. Periutsit imm. 1-imi taaneqartut atorineqarnissaannut piumasaqaatit, taakkununga ilanngullugit uppersaatsit suleriaatsillu pisariaqartut pillugit malittarisassanik Naalakkersuisut akuersisinnaapput.

Imm. 3. Akiuiniariaatsit immikkut ittut ilaasa akiuiniarnissamut pilersaarutit ilaattut atorineqannginnissaat pillugu Naalakkersuisut aalajangiisinnaapput.

Kapitali 7

Nakkutillineq

§ 9. Uumasunut Nakorsaqaarnermut Inuussutissalerinermullu Oqartussaasut piunasaqaatit inatsimmi aalajangersarneqarsimasut malinneqarnissaannut pisariaqartutut isigineqartunik aalajangiisassapput, taakkununga ilanngullugu erseqqissaanernik, peqqussutunik inerteqqutinillu nalunaaruteqartassallutik.

Imm. 2. Uumasunut Nakorsaqaarnermut Inuussutissalerinermullu Oqartussaasut peqqussutunik inerteqqutinillu nalunaaruteqartoqartinnagu, susassaartunik illuatungerisanik tusarniaaqaartassapput.

Imm. 3. Peqqussut inerteqqulluunniit malinneqanngippat, Uumasunut Nakorsaqaarnermut Inuussutissalerinermullu Oqartussaasut nioqqutissanik peqqussuteqarfigineqarsimasunik imaluunniit inerteqqutigineqarsimasunik suujunnaarsitseqqusisinnaapput, aamma uumasut napparsimasut akiuussutissamik kapillugit toqutsillugilluunniit. Suujunnaartitsineq, akiuussutissamik kapisineq toqutsinerlu suliffeqarfimmut aamma piginnittuanut akiligassanngorlugu pisassaaq.

§ 10. Uumasunut Nakorsaqaarnermut Inuussutissalerinermullu Oqartussaasut uppersaammik atorsinnaasumik eqqartuussisumiillu aalajangiinertaqanngitsumik, inatsimmi matumani imaluunniit inatsit una malillugu malittarisassani aalajangersarneqarsimasunik suliassanik naammassinninnermi atorneqartussanik paasissutissanik pissarsiniarlutik pisortat illuutaannut namminerisamillu illuutitut, sumiiffinnut, assartuutitut, niuertarfiup allagaataanut, pappiaqqanut il.il. , tassunga ilanngullugit aamma atortussianut elektronikki atorlugu toqqorneqarsimasunut sukkulluunniit isersinnaapput.

Kapitali 8

Naammagittaalliorneq

Uumasunut Nakorsaqaarnermut Inuussutissalerinermullu Oqartussaasunit aalajangiiffigineqartut Aalisarnermut, Piniarnermut Nunalerinermullu Naalakkersuisoqarfimmut naammagittaalliutigineqarsinnaapput.

Imm. 2. Naammagittaalliorsinnaatitaapput:

- 1) aalajangiinnermi pineqartoq, aamma
- 2) kinaluunniit suliassap inernerata qanoq kinguneqarneranik nammineerluni annertuumilluunniit soqutigisaqartoq.

Imm. 3. Naammagittaalliorneq piffissaliussaq tassaavoq ulloq aalajangiinerup nalunaarutigineqarfianiit sapaatit akunneri arfinillit qaangiutsinnagit.

Imm. 4. Naammagittaalliuteqarneq Naalakkersuisut allamik aalajangiisimatinnagit kinguartitsinermik kinguneqassanngilaq.

Kapitali 9

Pineqaatissiissutit

§ 12. Inatsimmi immikkut allamik tunngavissaqarluni pineqaatissiissut sakkortunerusoq atorneqartariaqartoq isumaqartoqanngippat, arsaarinninnermik akiliisitsissummilluunniit pineqaatissinneqarsinnaavoq:

- 1) § 9 malillugu aalajangiussanik malinninngitsoq, imaluunniit
- 2) § 10 malillugu nakkutilliinermi oqartussanik isertitsinngitsoq.

Imm. 2. Inatsisartut inatsisaat manna malillugu najoqqutassiani atulersinneqartuni najoqqutassani aalajangersakkanik unioqqutitsinermi akiliisitsinermik arsaarinnissuteqarnermilluunniit pineqaatissiinissaq pillugu malittarisassanik aalajangersaasoqarsinnaavoq.

Imm. 3. Inatsisitigut piginnaatitaasut pisussaataitaasullu Kalaallit Nunaanni pinerluttulerinermi inatsimmi maleruagassat malillugit pillaanermi akisussaatinneqarsinnaapput. Kalaallit Nunaanni Namminersornerullutik Oqartussat, kommuni kommunilluunniit ataatsimooqatigiiffiat unioqqutitsisuuppat Kalaallit Nunaanni Namminersornerullutik Oqartussat, kommune kommunilluunniit ataatsimooqatigiiffiat akiliisitaanermik pineqaatissinneqarsinnaavoq.

§ 13. Inatsimmik unioqqutitsisoq unioqqutitsinermi pisuunini nassuerutigippagu, piffissallu aalajangersimasup iluani akileeqqusissut qinnuteqarnikkut sivitsorneqarsinnaasup akilernissaanik nalunaaruteqarpat, Naalakkersuisut nalunaaruteqarsinnaapput suliaq eqqartuussivikkoortinnagu aalajangiivigineqarsinnaasoq.

Imm. 2. Imm. 1-imi nalunaarut taaneqartoq eqqarsaatigalugu Kalaallit Nunaanni eqqartuussisarnermi inatsimmi allakkamut unnerluussutaasumut piumasagaatit pillugit aamma oqaaseqarnissamut pisussaaffeqannginneq pillugu aalajangersakkat taamatuttaaq atuupput.

Imm. 3. Akiliisitsissut piffissaagallartillugu akilerneqarpat, imaluunniit akuerineqarnerata kingorna akilerneqarpat imaluunniit pillaatissaq atorneqarpat malersueqqinnissaq atorunnaassaaq.

§ 14. Akiliisitsissutit, Inatsisartut inatsisaat manna naapertorlugu imaluunniit Inatsisartut inatsisaat manna naapertorlugu najoqqutassat malillugit eqqartuussutigineqartut Nunatta Karsianut tutsinneqassapput.

Kapitali 10 Atortuulerfia

§ 15. Inatsisartut inatsisaat 1. januar 2016-imi atuutilerpoq.

Imm. 2. Tamatumunnga peqatigitillugu inuussutissanik uumasullu nappaataannik inunnut tunillaassorsinnaasunik nakkutilliineq pillugu Inatsisartut peqqussutaat nr. 17, 28. oktober 1993-imeersoq atorunnaarsinneqarpoq.

Imm. 3. Najoqqutassat inatsisartut peqqussutaanni pineqartuni imm. 2 malillugu atuutsinneqalersut atuutiinnassapput allanik taarserneqarnissamik tungaannut imaluunniit inatsit manna Inatsisartulluunniit inatsisaat allat malillugit maleruagassatut aalajangersakkat atorunnaarnissaasa tungaannut.

Namminersorlutik Oqartussat, ulloq xx. xx 201x

Kim Kielsen